



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Oe-Cusse
25 Jullu 2014

**Tribunál Distritál Oe-Cusse hala'ó inspesaun judisial iha fatin akontesimentu ba kazu
krime hasoru flora no fauna**

Iha 17 Jullu 2014, Tribunál Distritál Oe-Cusse hala'ó prosesu inspesaun judisial iha fatin akontesimentu ba kazu krime hasoru flora no fauna ne'ebé involve arguidu AB hasoru Ministériu Floresta iha 22 Setembru 2013 iha Suku Abani, Sub-distritu Pasabe, Distritu Oe-Cusse.

Inspesaun ne'e hala'ó bazeia ba julgamentu produsaun provas ne'ebé sei hamosu duvidas ba tribunál, mesmu tribunál rona ona deklarasaun hosi arguidu no depoimentus hosi testemuña sira.

“JSMP apresia ho iniciativa ne'e, tanba liuhosi inspesaun ba fatin akontesimentu bele produz indisius ba tribunál atu estabelese juis sira nia konviksaun antes halo desizaun ba kazu ne'e” dehan Diretór Ezekutivu JSMP, Luis de Oliveira Sampaio.

Ministériu públiku akuza katak iha 22 Setembru 2013, maizumenus iha oras tuku 08:00 dader arguidu tesi/ kadoo ai teka hun rua (2) ne'ebé pertense ba propriedade Ministériu Floresta, Distritu Oe-Cusse nian. Iha momentu ne'ebá Guarda Florestal konsege hapara arguidu atu la kontinua tesi ai teka hirak ne'e maibé arguidu konsege tesi ona ai hun rua (2). Relasiona ho aktu ne'e, ministériu públiku akuza kontra artigu 217 KP.

Antes ne'e iha 25 Juñu 2014, Tribunál Distritál Oe-Cusse hala'ó prosesu julgamentu ba kazu ida ne'e, maibé tanba tribunál nafatin iha duvidas ho deklarasaun hosi arguidu no testemuña sira, nune'é tribunál marka fila fali agenda hodi halo inspesaun ba fatin akontesimentu.

Iha tribunál arguidu deklarata katak nia kuda ai teka refere iha tinan 2001. Iha parte seluk, testemuña DT depoimenta katak ai teka ne'ebé arguidu tesi la'os arguidu mak kuda maibé moris ona desde iha tempu portuges.

Tuir mai, testemuña seluk ho inisial VP, depoimentu katak ai teka refere moris iha arguidu nia rai no hahu hosi tinan 2001 arguidu halo lutu, kuda mós derok, has, ai teka, ai kakeu. Testemuña salienta liutan katak iha tempu Indonezia rai refere hanesan dalan mota.

Testemuña ida seluk ho kapasidade nu'udar Xefe Florestal Distritál Oe-cusse depoimenta katak ai hotu rejistradu tantu privadu no estadu nian, maibé populasaun nafatin tesi hotu ai teka ne'ebé pertensia ba estadu.

Iha alegasaun finál, ministériu públiku konfirma katak arguidu provadu tesi ai teka hun rua (2), nune'e depoisde halo inspesaun iha fatin akontesimentu, ministériu públiku hare katak ai teka refere boot ne'ebé presiza tinan barak maizumenus tinan 25 atu bele moris no boot hanesan ai teka ne'ebé arguidu tesi. Faktus ne'e, kontrariu ho deklarasaun arguidu nian katak nia mak kuda ai teka ne'e iha tinan 2001. Tanba ne'e, ministériu públiku husu ba tribunál atu aplika pena adekuadu ba arguidu.

Entretantu parte defeza, husu ba tribunál atu aplika pena ne'ebé justu tanba arguidu tesi ai refere sein koñesimentu hosi parte kompetente hanesan Ministériu Florestal Distritu Oe-Cusse.

Depois alegasaun finál husi ministériu públiku no defeza, tribunál marka fali agenda ba leitura sentensa iha 31 fulan Jullu tinan 2014 horas tuku 02:30.

Prosesu inspesaun ne'e deriji hosi juis singular, Dr. João Ribeiro, ministériu públiku representa hosi Dr. Alfonso Lopes no arguidu hetan defeza husi Dr. Afonso Fatima Gomes hosi defensoria públiku.

“Kommunikadu imprensa ida ne'e bele imprimi tanba ho apoiu jenerozu husi povu Amerikanu liu husi Ajensia Estados Unidus ba Dezenvolvimentu Internasionál (USAID) bazeia ba Akordu Kooperasaun ho Númeru AID-486-A-13-00007 ba programa Ba Distrito iha Timor-Leste, ne'ebé nia implementasaun lidera husi Ajensia Counterpart International ho nia parseiru sira. JSMP mak responsabiliza tomak ba konteudu no hanoin iha komunikadu imprensa ida ne'e nia laran no la nesesariamente refleta USAID ka Governu Estados Unidus Amerikanu nia opiniaun”.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaune-mail: <mailto: luis@jsmp.minihub.org> luis@jsmp.minihub.org

<mailto: info@jsmp.minihub.org> info@jsmp.minihub.org

Telefone:3323883/77295795

Website: <<http://www.jsmp.tl>> www.jsmp.tl

Facebook: <<http://www.facebook.com/timorleste.jsmp>>

www.facebook.com/timorleste.jsmp

Twitter: @JSMPtl